

Haf nobo di Boneiru: ménos gastu, naturalesa i repartishon ta pidi atenshon

Un haf di karga nobo na Boneiru ta baha e gastunan di transporte. No ta garantisá ku e redukshon di gastu ei lo resultá tambe den kosto di bida mas abou pa habitantenan di e isla. Tambe mester di mas investigashon di e efekto riba naturalesa den e zona. Asina Centraal Planbureau (CPB) ta bisa den un rapòrt publiká awe.

Entidat Públiko Boneiru (EPB) a pidi CPB pa analisá e análisis di kosto i benefisio sosial (MKBA) ku tin riba mesa pa e plan di Haf di Karga di Boneiru. Den e 'second opinion' akí, CPB ta analisá te kon leu e MKBA ta duna un bon bista di gastu- i benefisionan di diferente alternativa.

Na e momentunan akí tantu barku di karga komo barku krusero ta mara na e wafnan den sentro di Kralendijk, kapital di Boneiru. Pa transporte di kòntainer pa Boneiru mester hasi un trasbordo adishonal na Kòrsou. Esaki ta resultá den tempu di entrega mas largu i gastunan mas haltu. MKBA ta investigando dos sitio nobo pa atendé ku transporte di karga: e tereno di Water Energie Bedrijf (WEB) i e tereno di BOPEC, e kompania di almasenamentu di zeta ku a deklará bankrut na 2021.

Efektonan riba naturalesa

E investigadónan di CPB ta realisá ku un haf nobo sigur tin efekto riba kon rápido kònteinernan ta yega Boneiru. Tambe e gastunan di transporte ta baha. E konsekuensianan pa naturalesa i partikularmente e efekto físiko riba biodiversidat i koral den laman Karibe, segun CPB, ta rekerí un elaborashon mas detayá den un Raportahe di impakto ambiental (MER). Tambe lo mester averiguá si i kon lo por aliviá òf kompensá e konsekuensianan aki.

Kosto di bida

Ken ta esnan ku lo benefisiá di gastunan di transporte mas abou, segun CPB ainda no ta kla. E pregunta ta si e Bonerianonan lo benefisiá komo ku e preisnan pa konsumidó ta baha òf si ta mundu empresarial lo gana mas plaka ku esaki. E repartishon ta dependé di kuantu kompetensia tin riba tereno di transporte di karga pa e isla i kua otro maneho EPB ta akordá pa loke ta trata e haf i e forsa di merkado. CPB ta bisa ku palabrashonnan tokante maneho di haf i forsa di merkado mester hunga un papel hopi enfátiko den e desishon riba un haf nobo, i no solamente despues.